



## **MEMORANDUM O RAZUMIJEVANJU I SARADNJI**

IZMEĐU

UDRUŽENJA SUDIJA U BOSNI I HERCEGOVINI

UDRUŽENJA ŽENA SUDIJA U BOSNI I HERCEGOVINI

UDRUŽENJA SUDIJA FEDERACIJE BOSNE I HERCEGOVINE

UDRUŽENJA TUŽILACA FEDERACIJE BOSNE I HERCEGOVINE

Sarajevo, 12. oktobar 2020. godine

**Podsjećajući se na i potvrđujući** misiju, viziju i ulogu, odnosno *raison d'être* udruženja nosilaca pravosudnih funkcija u Bosni i Hercegovini proklamovane u njihovim statutima, a iz kojih proizlazi dužnost i obaveza za ustrajnom i dosljednom promocijom nezavisnog, nepristrasnog, profesionalnog, odgovornog, etičnog, efikasnog i transparentnog pravosuđa koje uživa povjerenje građana Bosne i Hercegovine s ciljem jačanja pravne države, osiguranja vladavine zakona, te afirmacije i poštivanja temeljnih ljudskih prava i sloboda;

**Razumijevajući** potrebu da udruženja nosilaca pravosudnih funkcija u Bosni i Hercegovini proaktivno i konstruktivno učestvuju u reformsko-integracijskim procesima unaprjeđenja pravosuđa u Bosni i Hercegovini, pri tome istrajno zalagajući se za nezavisno i nepristrasno vršenje pravosudnih funkcija, te podizanju ugleda, dostojanstva i materijalnog položaja nosilaca pravosudnih funkcija;

**Svjesni** uloge udruženja u promoviranju odgovornosti, profesionalne etike i integriteta, te vraćanju i jačanju povjerenja javnosti u rad pravosudnih institucija i nosilaca pravosudnih funkcija;

**Uvažavajući** činjenice da je uspostavljanje efikasnog mehanizma saradnje i uzajamne koordinacije između udruženja nosilaca pravosudnih funkcija u Bosni i Hercegovini za postizanje najboljih rezultata na zajednički definisanim prioritetima od ključne važnosti za služenje općem interesu pravosuđa u skladu sa međunarodnim standardima i najboljim praksama, te formulaciju i iznošenje konstruktivnih prijedloga i stavova u reformskim procesima od interesa za unaprjeđenje funkcionisanja pravosuđa i položaja nosilaca pravosudnih funkcija;

**Pozdravljajući** inicijativu Udruženja tužilaca Federacije Bosne i Hercegovine od 19. novembra 2019. godine, sa željom da potakne sva strukovna udruženja u bosansko-hercegovačkom pravosuđu, da se zajedničkim snagama i združenim naporima uključe u borbu za unapređenje rada pravosuđa, te jačanju položaj nosilaca pravosudnih funkcija u Bosni i Hercegovini, Potpisnici dana 12. oktobra 2020. godine u Sarajevu zaključuju:

# MEMORANDUM O RAZUMIJEVANJU I SARADNJI

## Član 1.

### Svrha Memoranduma

- (1) Svrha ovog Memoranduma je uspostavljanje efikasnog mehanizma saradnje i uzajamne koordinacije između Potpisnika u vezi sa pitanjima koja su od zajedničkog interesa, te definisanje okvira, načela i modaliteta saradnje, radi efikasnog funkcionisanja i ostvarivanja zajedničkih ciljeva.

## Član 2.

### Ciljevi i predmet saradnje

- (1) Predmet saradnje prema ovom Memorandumu podrazumijeva, ali se ne ograničava na:
- a) Formulisanje, predlaganje i zagovaranje zajedničkih analiza, inicijativa, preporuka, prijedloga i stavova prema relevantnim akterima u pravcu unaprjeđenja sistemskih, organizacionih i zakonodavnih aspekata funkcionisanja pravosuđa s ciljem promoviranja i osiguranja nezavisnog, nepristrasnog, profesionalnog, odgovornog, etičnog, efikasnog i transparentnog pravosuđa;
  - b) podizanje i šticeenje ugleda i dostajanstva, te unaprjeđenje statusa nosilaca pravosudnih funkcija;
  - c) promoviranje institucionalne i individualne odgovornosti, profesionalne etike i integriteta nosilaca pravosudnih funkcija, te jačanje povjerenja javnosti u rad pravosuđa;
  - d) proaktivno i konstruktivno sudjelovanje u reformskim procesima od interesa za pravosuđe, te saradnja sa Visokim sudskim i tužilačkim vijećem Bosne i Hercegovine, organima zakonodavne i izvršne vlasti, nevladinim sektorom i međunarodnim organizacijama;
  - e) analiza i praćenje efekata predloženih i usvojenih reformskih inicijativa, primjene zakonskih i podzakonskih propisa, davanje mišljenja u vezi sa njihovom primjenom, kao i potrebi njihovog usklađivanja i/ili donošenja izmjena i dopuna u kontekstu unaprjeđenja funkcionisanja pravosuđa;
  - f) sva ostala pitanja od zajedničkog interesa koje definišu Potpisnici.

## Član 3.

### Namjera Potpisnika

S ciljem osiguranja efikasnosti rada u okviru ovog Memoranduma, Potpisnici izražavaju spremnost da ostvare saradnju, kako slijedi:

- a) Potpisnici iskazuju spremnost da ulože sve napore kako bi saradivali na usaglašen i ujednačen način;
- b) Potpisnici izražavaju namjeru da se redovno međusobno informišu i konsultuju o pitanjima od zajedničkog interesa;
- c) Svaki od Potpisnika će pozivati i uključivati predstavnike ostalih Potpisnika u događaje i aktivnosti koje organizuje, a koje ulaze o domen ovog Memoranduma i mogu biti od interesa za druge Potpisnike.

- d) Potpisnici izražavaju namjeru da osiguraju adekvatno učešće svojih predstavnika u aktivnostima koje se provode na temelju ovog Memoranduma, kao i da omogući njihovo prisustvo u skupovima koji se organizuju u oblastima definisanim ovim Memorandumom.
- e) Analize, inicijative, preporuke, prijedlozi i stavovi koje proisteknu iz aktivnosti Potpisnika temeljem ovog Memoranduma, biće učinjeni dostupnim svim Potpisnicima.

#### Član 4.

### **Uspostavljanje Zajedničkog koordinacijskog tijela**

- (1) Ovim Memorandum se uspostavlja Zajedničko koordinacijsko tijelo udruženja nosilaca pravosudnih funkcija u Bosni i Hercegovini (u daljem tekstu: ZKT) radi efikasnije saradnje i koordinacije prilikom ostvarivanja ciljeva iz člana 2. ovog Memoranduma.
- (2) Saradnja Potpisnika u okviru rada ZKT se temelji na načelima dobrovoljnosti, uzajamnog poštivanja i međusobnog prihvatanja organizacijske strukture i internih procedura rada svih Potpisnika.
- (3) Svi Potpisnici zadržavaju pravo na samostalno djelovanje i provođenje aktivnosti unutar svojih udruženja.

#### Član 5.

### **Članstvo u Zajedničkom koordinacijskom tijelu**

- (1) Članove ZKT čine predstavnici Potpisnika Memoranduma.
- (2) Svaki Potpisnik delegira jednog predstavnika u ZKT na period od jedne godine.
- (3) U slučaju spriječenosti delegiranog predstavnika da učestvuje u radu ZKT, svaki Potpisnik će osigurati zamjenskog člana.
- (4) Svaki član ZKT je zadužen za direktnu komunikaciju i koordinaciju zajedničkih aktivnosti između ZKT i udruženja ispred kojeg su delegirani.
- (5) Ovom Memorandumu se mogu pridružiti i druga profesionalna udruženja. Potpisnici odlučuju o prijemu novih udruženja u članstvo ZKT.
- (6) ZKT će radi ostvarivanja ciljeva iz člana 2. Memorandum održavati redovne sastanke, razmjenjivati informacije, te realizovati zajedničke inicijative i projekte.

#### Član 6.

### **Predsjedavajući i zamjenici predsjedavajućeg**

- (1) ZKT ima predsjedavajućeg i jednog zamjenika predsjedavajućeg, koji se biraju na mandat od jedne godine prostom većinom glasova svih članova ZKT na konstituirajućoj sjednici ZKT.
- (2) Predsjedavajući priprema dnevni red za sastanke ZKT, te saziva i predsjedava sastancima ZKT. Predsjedavajući zastupa i predstavlja ZKT u skladu sa odlukama ZKT. U slučaju spriječenosti, predsjedavajućeg mijenja zamjenik predsjedavajućeg u skladu sa odlukom ZKT.
- (3) U radu ZKT predsjedavajućem pomaže zamjenik predsjedavajućeg, te drugi članovi ZKT, prema potrebi.
- (4) Svi članovi ZKT imaju pravo delegiranja tema na dnevni red i iniciranja sazivanja sastanaka ZKT.

## Član 7.

### **Način rada Zajedničkog koordinacijskog tijela**

- (1) Kvorum za odlučivanje čine svi članovi ZKT koji blagovremeno glasaju.
- (2) ZKT donosi odluke prostom većinom glasova svih članova koji čine kvorum za odlučivanje. ZKT će za svaku odluku odrediti rok unutar kojeg se odluka mora donijeti. U slučaju da neki od Potpisnika ne zauzme stav i donese odluku unutar dogovorenog roka, isti neće činiti kvorum za odlučivanje.
- (3) U slučaju neslaganja sa većinskom odlukom, svaki Potpisnik zadržava pravo da izrazi i objavi izdvojeno mišljenje.
- (4) U slučaju da su prilikom donošenja odluke glasovi podijeljeni, svi Potpisnici zadržavaju pravo da zajednički ili pojedinačno izraze i objave svoje mišljenje.
- (5) Prilikom glasanja, članovi ZKT ne mogu biti suzdržani.
- (6) Svaki Potpisnik donosi odluku o načinu glasanja unutar ZKT u skladu sa svojim statutom. Svaki Potpisnik će u skladu sa svojim statutom osigurati efikasno zauzimanje stavova i blagovremeno donošenje odluka.
- (7) ZKT donosi odluke na sastancima, elektronskim i/ili telefonskim putem. Sve odluke iz stavova (2), (3) i (4), uključujući izdvojena mišljenja, će se zajednički objavljivati.

## Član 8.

### **Promicanje saradnje**

Potpisnici su saglasni da koriste svoje nazive i simbole u aktima koja se donose u okviru ovog Memoranduma.

## Član 9.

### **Izmjene i dopune Memoranduma**

- (1) Planirani obim i modaliteti saradnje definisani ovim Memorandumom mogu se dodatno izmjeniti i/ili dopuniti aneksima uz ovaj Memorandum, a na osnovu pisane saglasnosti svakog od Potpisnika.
- (2) Svaki Potpisnik u pisanoj formi obavještava ostale Potpisnike o prestanku saradnje u okviru ovog Memoranduma.
- (3) U slučaju bilo kakvog spora koji može nastati između Potpisnika u vezi sa tumačenjem ili primjenom ovog Memoranduma, Potpisnici će se međusobno konsultovati u cilju iznalaženja dogovornog rješenja prihvatljivog za sve Potpisnike.

## Član 10.

### **Stupanje na snagu i završne odredbe**

- (1) Ovaj Memorandum stupa na snagu danom potpisivanja.
- (2) Ovaj Memorandum se sačinjava u dovoljnom broju primjeraka, od kojih svaki Potpisnik zadržava po jedan primjerak.

Udruženje sudija Federacije Bosne i Hercegovine

Broj:

\_\_\_\_\_  
HAKIJA ZAJMOVIĆ, predsjednik

Udruženja sudija u Bosni i Hercegovini

Broj:

\_\_\_\_\_  
MIRJANA DEVIĆ, predsjednica

Udruženja žena sudija u Bosni i Hercegovini

Broj:

\_\_\_\_\_  
ADISA ZAHIRAGIĆ, predsjednica

Udruženje tužilaca Federacije Bosne i Hercegovine

Broj:

\_\_\_\_\_  
ŠEILA HELJIĆ, predsjednica

Potpisano u Sarajevu dana, 12. oktobra 2020. godine